

# OMUKWETU

Registered at the General Post Office as a Newspaper

## OSHIGONGI SHAASITA MONGWEDIVA

Oshigongi shaasita yaELOK shokomu-mvo osha li sha ningilwa mOngwediva esiku 8-12 gaSeptemba 1975. Omwa li mwa gongala aasita 74 naaTeolohi aakiintu 2. Pamauthompango oshigongi shika otashi wilikwa kOmumbisofi gwongeleka, ihe oshi na wo ompito okuhogolola omusita gulwe a kale omupehawiliki gwoshigongi. Molufo nduno okwa hogololwa omutonateli gwoshitayi sha-Kavango omusita Natanael Sirongo oye a kale omupehawiliki moshigongi shika.

Aasita oya kala koho yomvula yohapu dhaKalunga ethimbo alihe lyoshigongi. Oshigongi osha tamekithwa nelongokalunga nepopitho lyeuvitho. Omumbisofi Dr. Leonard Auala oye a ningi euvitho lyetamekitho noohapu Mat.22:27-40 sho e dhi lesa okwa tumbula kutya: "Onda tala kutya ndika oyo euvitho lya gwana lyOmuwa gwetu, nolye tu gwanena mohungi yetamekitho." Hola Omuwa Kalunga koye Ov.37, Oshipango oshinene noshotango ooshika, noshitiyali shi thike pusho muunene nomondjundo "Hola omukweni nga ngoye u ihole." Ohole yokuholo Kalunga ndjoka hayi lalakanenwa koyendji, ita yi vulu okukala mutse ngele katu hole omukwetu, nomukwetu otu na okumuhola ohole tayi vulu okutu fala sigo omeso ngashi Jesus e shi tuningile. Onda thiminikwa momwenyo keindilo ndika ohungi ndjika tu yi ninge ohungi yomagalikano nokwiiyaneka tse yene kuKalunga." Osho ngaaaka Aasita ayehe oyi inyongamene koshipala shaKalunga nokufala ewi pombanda oogumwe noogumwe sigo ayehe ya fala ewi pombanda okukugila Kalunga megalikano lyuukumwe.

Oyendji oye shi tala etameko lyoludhi nduka oyo lye etitha omayambeko oge ndji moshigongi. Esiku lya landula otundimbimbeli oya ningwa komusitagongalo Efraim Angula pa 1Kor.13:8. "Oonkondo oonene muuyuni auhe odho O-



Dr. Leonard Auala

HOLE" Okwa fatulula nkene ohole tayi monika yi na oonkondo okufala mehupitho. okwa yoolola ohole yopaKalunga moohole dhopyuni dha nika eso. Sho a yeleanitha ooverse, Ondjimbolela 8: 6-7 na 1Kor.12:8. Osha yele shili kutya OHOLE yaKalunga oyi na oonkondo mokuhupitha omulunde yivule eso. Dhi ileshela utale mOmbimbeli yoye. Okwa yelitha nkene momagongalo getu, aakriste ayehe muuyuni auhe taa pumbwa OHOLE ndjika yaKalunga. Ihe otayi falwa ko kaantu yi ithanenwa oshilonga kOmuwa mwene, yelesa lil.21:13. Neimbilo lya-Paulus Rom.8:35-39 ihe ngoka keehole Omuwa (koneka nOmukweni) Paulus ote mu tile ngeyi 1Kor.16:22.



Omusitagongalo tatekulu Vilho Kaulinge okwa popitha aakwashigongi noohapu Hesk.34:1-10. "Omusita noonzi pethimbo ndika." Mpaka okwa yelithile aasita nkene pamwe noshilonga shuusita, Kalunga okwa gandja OHOLE ngashi tashi holo-ka moshipango shohole. Okwa yelitha wo nkene aasita yokwiilitha yoyene taa pewa uusama koohapu ndhika notaa tompwa, mpaka eitedhululo alike tali tumbiwa.

**HOLA omutondi gwoye, pa Mat.5:43-47** osha etwa kutate Natanael Shinana moka a holola nkene ohole yokuhola omutondi e yi tala oyo osheelo sha thinana nani. Ihe Jesus mwene okwa popi nale mosheelo shika sho a kala e hole aatondi ye manga a kala kombanda yeve, onkee shika osho oshiholelwa, tse wo tu hole aatondi yetu mboka taye tu konene noku ya ningila ngashi sha popiwa mu Rom. 12:20-21.

Ihe osha yela wo kutya, omuuvithi gwoohapu dhaKalunga ke na omutondi gulwe kakele kaangoka etonde shili oohapu dhaKalunga, oyo mbaka wo tu na oku ya hola.

Osho ootundimbimbeli onkwawo odha landulathana, adhihe odha popi nokuyelitha OHOLE yaKalunga yaa noongamba mokuholo omulunde, oyo ye mu fala mpoka a se komushigakano.

Omusita Daniel Imalwa motundimbimbeli ye pa Rom.5:3-8 okwe tu yelithile nawa ohole yaKalunga yaa noongamba. Kalunga mokuholo aantu ke na oongamba dha sha oku hole omuntu kehe nohole yi thike pamwe. Ohole ndjoka ngele yi li mutse itatu kala we noongamba dha sha, aashitwa yaKalunga ayehe otatu ya tala aaholike yaKalunga nonkene oyo aaholike yetu wo. Katu na aatondi nokuli.

Omusita Elia Niinkoti okwe tu fatululile nawa niitya yoshigreka kutya ohole ndjoka yomuKalunga, ndjoka yi noonkondo, ndjoka yaa na oongamba tayi vulu okuhola nomutondi wo, oyo kayi mo momuntu oyi nokuza muKalunga mwene te yi tilile mooitaali ye, notayi monika mukukalathana kwawo naantu, oyo ya lukwa moshigreka "agapee," inayi faathana noohole dhetu dhopantu ndhoka hadhi tiwa moshigreka "eros" ohole ndjoka yomuKalunga ngele ya tililwa mutse otayi shitulula oohole dhetu dhopantu

dshivulikithwe kohole yopaKalunga. Aasita oya kala nokwiimba okaimbilo haka ethimbo nethimbo.

**Omuwa pendj 'ohole yoye  
Uva Omuwa, uva Omuwa  
Omuwa pendj 'ohole yoye  
Uva Omuwa.**

Pomathimbo ngaka omadhigu nomatilithi gupolitika otu na okukotokeni twaa pwile memakelo, pomathimbo ngaka gokukondjela omamanguluko otu na okugalikana, oshoka omuyevangeli ta ti: "Otangotango kongeni oshilongo shaKalunga nuuyuuki we, nena ayihe otamu yi gwedhelwa ko omagano."

Aakwetu omwa tula tuu moluyo? omuyenda pamwe ote ku adha kuu na nando okasila? Oto mu pe shjike? Ethimbo lyoku tsa olya piti, ngo-ye manga waa na sha ye omuyenda a thiki nale?

Jesus ota ti: "Kaleni mwa kotoka, tonateni ne mu galikane, oshoka esiku ndyoka kamu li shi uuna talj ya.." (Mark. 13:33) Aakwetu, ehulilo oli li popepi. Jesus ta lombwele aalongwa ye ta ti: "Oshigwana otashj ts' ondumbo oshikwawo, iilongo otayi ka thikamenathana, otaku zi omakakamo gevi koombinga noombjnga, ondjala tayi ya." (Mark. 13:8) Mbika oya holoka mokati kaantu nokuli.

Omuwetu owa uvu tuu shoka sha njingwa muTurkye nomuNicaragua? Owa uva tuu ondjala ondhigu muAfrika? Owa uva tuu oonkundana dhiita? Eeno, ngoka ogo omathimbo ga popiwa kOmuwa Jesus. Ndhindhiljka u tale, ngashingeyi uuyuni owa tya ko kondongolondongo wa tya kombala yefuma, omasiku oge ya. Tu kale- ni twa tsileni uusila moluyo, nokutya tu dhigineni omishigakano dhetu, pamwe owa dhimbwa nokuli oohapu we dhi lombwela esjku lyeshasho lyoye? Tu kotokeni oolamba dhetu dhaadhimwe komasilu nomalambo guuyuni mbuka.

Oshoka uuyuni nando u piyagane nenge u udhe oosatana, naatondi yeitaalo nande naye tu thimjike ngiini tse inatu pumbwa okutula. Oshoka tse otu na Omukulili nomupopili, oye ehuyanza lyetu, oye tuu nguka kwa li ko noku li ko note ya omunankondo awike. Otu neni Omukulili e na omwenyo u mu shi tuu?

**Epafras T. Elago**

**ONGALO OMOLU ETUNGONGELEKA  
KELOMBE**

Jesaja V. Mulundu	R2,02
Nangombe Kombo	R4,20
Nabot Akwaake	R2,02
Filemon Nd. Nakanyala	R2,00
Hileni Mbeeli	R3,50
Yilwe ya umbwa mokuhehela	R1,16

Ayihe kumwe R14,90

*Omuheheli Jesaja Nanaombe*

**Uva Omuwa, Uva Omuwa.  
Omuwa pendj 'ohole yoye  
Uva Omuwa.**

Moohapu ndhika, Kalunga mwene okwa popi natse notwa hala okuuva ko tse tu landule Omuwa: Omumwaameme omuholike nomuleshi omukwetu, ila tu yeni kOmuwa, oku li popepi na ngoye. Ino hekwahekwa komalongo nomapopyo ga kwenyuka noga lyuka, ihe landula evangeli lya yela lyOshilongo shaKalunga. "IHE OHOLE ONENE YI VULE AYIHE MBIKA" 1Kor.13:13. Oohapu ndhika odho dha kala tadhi wilike oshigongi ashihe, ngaashi wo odho dhi li oshipalanyolo shOngeleka yaKristus mOwamboKavango nuumvo.

Aasita oya kundathana wo ngaa iinima yilwe yi na sha nomawiliko nomalelo gomagongalo nongeleka ayilhe, osho wo pamwe nokukumidhathana oya ningi wo omafaneko omape giilonga.

**Omuwetu**



# OMUYAPOSTOLI GWOHOLE MUUYUNI WETU

## Dha za kOmukwetu No 18 Epandja 7

Opo mpaka tatu adha uule womadhiladhilo goshili kombanda yeitaalo lyomukriste mekwatathano nomushigakano. Omomushigakano tatu monene uukwaaluhe nohole yomuKalunga ndjoka tayi ya momathimbo getu. Oye nguka ta vulu oku tu gamena twaa punduke note tu pititha mo mesilu lyomjilema dhetyololoko, e tu londeke kondundu yetegameno, naangoka ta vulu oku tu pitha mo musiku wokwaana etegameno, e tu pitithile ongula yenyanyu, oye na simanekwe, oshoka oonkondo odhe, nEpangelo olye, aluhe sigo aluhe.....

Mekondjo lyeopaleko lyokukalathana noshipotha omwa fa ngaa mwe ya elunduluko ewanawa, ihe naashono osha vala omaudhigu omape. Oveta nando ya pitika aaluudhe ye ende nombili noya yakulwe nombili mokati kaatiligane, aaluudhe oyendji oya dhengwa nokukokololwa momapandaanda goshilando. Oobesa moka taye ende odha dhengwa nomamanya, omagumbo noongelesa dhawo odha bomwa po, mbali dhadhodho odha pi po thilu. Omukulukadhi gumwe e li metegelelo okwa nakagulwa nayi nokwa yahwa mokugulu. Egumbo lya Martin nalyo wo olya umbwa, oholo oya dhenge owala momweelo gwoshiwalanda. Osha li 1957.

Martin okwa hja oshigongi oshinene moka a gandja montaneho yaapulakeni omwenyo gwe gu ninge ondjambo yekondjelomanguluko lyantu ye. Okwa galikanana ta ti:

"Kalunga kandje, kape na ngoka a hala okusila mekondjo ndika, nangame nandi hala okusa. Ihe ngele nani ekondjo ndjika otali pula ombinzi yomuntu, nayi kale yandje." Peha lyoshigongi shi tye, Amen, ayehe oya tindi ngashi omuntu gumwe: Aawe, Martin, inatu hala u se.

Martin ina longitha ashike elongo lyohole ongo-shipango shaKristus, ihe okwa li wo i itaala kutya ohole oyo oshikondjitho oshinene mokweeta po uupe monkalo yaaluudhe. Okukondjitha uuyogoki mohole. osho sha li oveta ye. MuSeptemba 1968 manga e li mongulu yimwe ta talatala omambo momukunda gwopuushinda, omukulukadhi gumwe okwe ya te mu pula: (Omuluudhe).

"Ongoye Martin handi uvu?"  
— "Eeno, ongame."  
"Onde ku kongo nale"—a tsuwa nomwele.

Martin okwa lala ishewe iiwike yimwe moshipangelo ongomulongwa e li mosikola yokwilo-nga edhimitathanopo otali ti ngini.

Pethimbo ndika ombepo yondjuulukwe yemanguluko oya koko mokati kaaluudhe moshilongo ashihe, shaAmerika. Uutondwe wo woku- tonda omutiligane nawo owi indjipala. Ewiljiko enene lyoonkondo olya li lya pumbiwa okulotitha ombepo ya nwehwa mo kiiikonene noke- shunithilathano lyuwinayi. Martin okwa li noshimpwiyu shika komapepe ge. Moshipangelo a ze mo, a ka tsikila ishewe ilonga mbika ijidhi- gu.

Esiku limwe moshigongi oshinenene okwa ti kuyo moohapu dhi lyaathane popepi naandhoka dhOmuprofeti Jesaja 11: 6-9.

"Nandi mu lombwele oshinima oshinene nena. Nonando twa taalela omaudhigu ogendji, nena nenge ngula, onda yaguma natango ondjodhi kutya esiku otali ya muAmerika uuna tatu ka kaleni ngashi twe shi itaala ngashingeyi kutya, aantu ayehe oya shjwa ye thiike pamwe. Onda yaguma aana yaapika naana yaapiki taa vulu okukuutumba koshipundi shimwe yu uvjete uumwayinathana.

"Onda yaguma muAmerika omasilu taga ka tumba manga oondundu tadhika siluka. Omeitaa-

lo ndika tatu vulu okupanda omamanya mondundu yetyololoko, tu pande mo omamanya getegameno. Omejtaalo ndika tu na okulonga pamwe, tu kondjeni pamwe, tu yeni pamwe modholongo, twa thikama shimwe, tu shi shi, otatu ka sindana".

Konima yijwike itatu sho a popi ondjodhi ye ndjika 1963, uunona 4 owa dhipagwa koboma ya tegwa pOsikola yOsoondaha. Shika osha li emakelo edhigu kaakondjelimanguluko. Martin, pefumiko lyawo okwa popi a ti:

"Eso ndika otali tu londodha natango tu longe mohole nomokwaahulitha sigo ondjodhi ya gwanjithwa. Inaa sila osima, ihe nomoshini- ngwanima shika oshiwiniyi, Kalunga ota vulu okushita mo sha oshiwaniwa. Ombinzi ndjika yaa na oondjo ya tikile mpaka, nayi ete uuye- lele uupe monkalo ndjika yetu ya nika omile- ma."

Mekondjo lyaMartin, omeho ge oga li unene taga tala kaatiligane aakriste yomoshilongo, mboka a ti kutya oya kanjitha oshinakugwanjithwa shawo sheitaalo. Okwa ti kutya aantu ya tya ngaaka, itaa tedhulithwa nasha shilwe, ihe oneuvitho ashike lyijilonga yohole, oku ya taamba nohole nokukala nayo mohole. Shika Martin okwe shi tsakanitha. Oye sho kwa li ina tonda nando omutiligane gumwegumwe, nando a kondjele uuthemba waaluudhe, okwa simanekwa kaatiligane ngashi wo kaaluudhe. Ihe shoka itashi ti ando, aatondi ye oya pu po aawe.

Ohole sho ya koko muMartin, oye mu hingile nombili nomekondjelo lyombili yuuyuni. Naampaka okwa uvithile Epangelo lya Amerika a ti: "Ngoka to longitha iimaliwa yomayuyi ogendji omolwokukondjela anwa ombili muVietnam, owa nyengwa okugandja uuthemba nohole kumboka ya lala posheelo shondunda yoye."

Okwa yuulukwa mpaka ohole yi monike tango maanegumbo, manga inayi ulukilwa mboka ye li pondje. Inapu pita omasiku ogendji, omupresidende gwaAmerika pethimbo ndyoka Johnson, okwa popi moradio kutya ota tameke oonkundathana naVietnam omolwiita mbyoka. Osha nyanyudha Martin nokwa li a yuulukwa a monene nkene tashika ningwa.

Martin okwa li i itaala kee shi ashike omukondjelimbili moshilongo shawo, ihe uguuyuni auhe, ngashi wo okwa pewa kuuyuni ombandi yesimano omolwokukondjela ombili kwe.

Ihe mumwe naashjika, Martin okwa li wo a dhimbulula nokutya omasiku ge giilonga oga tya ko, opo a ka vululukwe pamwe naamboka ya longa. Moshigongi she oshinene sha hugunina miilonga ye, okwa hunganekele aapulakeni a ti: "Kandi shi wo, oshoka otwa taalela ngashingeyi omasiku omawinayi. Ihe oshili oyo ndjika kutya shono tashi ningilwa ndje, kashi na we ekwatho, oshoka onda adha kondongolondongo yokukalamwenyo kwandje.

"Onda hala ando ndi kale ko natango ngashi aantu ayehe ye shj hala. Nokukalamwenyo okule nokwo oku na ngaa ehulilo lyako. Shoka itandi ipula nasho shoka. Shono nda hala osho okulonga ehalo lyaKalunga. Kalunga oye a zimine ndje ndi tye kondongolondongo. Onda ligamene omeho gandje kegulu nonda mono oshilando sheuvaneko. Hwiyaika itandi yi ko nane, ihe onda hala mu shi tseye nena ndjika kutya, tse ongaantu, otatu ka kaleni mevi lyeuvaneko. Shika osho sha nyanyudha ndje nokandi na we omaipulo gasha. Inandi tila omuntu nando olye, Omeho gandje otaga tala eadhimo lyoshilongo tashi ya oshiuvanekwa."



Oshigongj osha pulakene sha mwena nye, kehe gumwe ota fudha kashonashona u uve oshitya kehe netumbulo kehe, Martin te li tumbula. Ngulangula eti 4.4.1968. Coretta, omukulukadhi gwe okwa mono ashike ongodhi tayi mu lombwele: Martin okwa yahwa notashj vulika a sa: Osha ningwa naana mEtine, moshiwike sha Pasa. Mbalambala euvitho lyaMartin olya penduka momadhiladhilo gomukulukadhi nkene he mu fatululile oshikalimo shoPasa. Oha ti:

"Etitano meso lyOmukulili, esiku ndyoka oonkondo dhomilema dha sindana. Esiku lyetyololoko nolyomalimbililo. Ihe ongula yeyumuko, otayi landula mbala. Esiku omilema tadhj sindjika, etegameno tali tameke ishewe nomuntu ou lwete ishewe omwenyo omupe, uuyeleele noshili".

Halumwe aluke nenge lwaali, jhe olwindjilwindji kutya Martin okwa holola puuyeleele nkene omwenyo gwe e gu gandja ondjambo kekondjo ndyoka kwa li i itaala kutya oshipewa she shapahalo lyaKalunga. Okwi itaala kutya eigandjo lye olyo ehupitho kumboka taa kondjo pamwe naye. Oshikalimo sheyumuko lyaKristus, okwe shi uvu ko tashi tsakanithwa miilonga ye noyaamboka taa kondjo pamwe naye. Oyana Martin okwe ya kumagidha aluhe a ti:

"Aamwandje, ongushu yomuntu kayi li aluhe muule womasjku ngoka a kala kombanda ye, ihe oyi li mushono e shi ningile aantu kombanda ye. Ngoka kee na sha shokuningila mu kwawo muuyuni, jna gwana a kale nomwenyo". Martin eso lye okwe li thikamene esiku kehe, kee na iikonene nuutondwe. Okwa valwa shili nokwa kokele monkalathano tayi ehama notayj ehamekathana, moka ombepo yomatongolathano tayi pangele. Ashihe okwe shi tsakanene mohole nohole ye inayi mu taambitha jinima ya puka. Ugoyoki auhe okwe u kondjitha maatondi ye nomaalongi pamwe naye, sigo momukulukadhi gwe megumbo, ihe omombepo yohole tayj dhibulukiwa kushaangoka. Oshikalimo shokulamwenyo kwe oonakuthigala momwenyo oya zimine kutya osho shoka shi li naana mevitho ndyoka e li uvjitha popepi neso lye sho a tile:

"Ishewe niishewe ote tengeneke kutya tse atuheni otatu ipula nokusa kwetu. Ishewe niishewe otandi ipula nesjku lyeso lyandje nefumviko noitandi shi ningi nomadhiladhilo ando omawinayj. Otandi ipula nesjku ndyoka kutya oshike mbela nda hala shi popiwe mo tashi hokolola ndje. Osho shika tandi shi mu pe ngashingeyi:

Ngaye inandi hala efumviko lya longekidhwa neitulomo enene. Nongele gumwe a pewa ompito a tumbule sha, ina ninga ehokololo eleelee. Aantu inamu ya lombwela mutye Martin okwa pelwe ombandi yesimano molwokokondjela ombjili, aawe. Haku ya lombwela omasindano galwe ngoka nde ga mono mokukalamwenyo kwandje. Haku ya lombwela mpoka nda sikola. "Esiku ndyoka onda hala omuntu ta lombwele aantu shila ta ti: Martin okwa kambadhala okugandja okukalamwenyo kwe keyakulo lyomuntu mukwawo. Onda hala omuntu shila ta ti: Martin okwa li ta kambadhala okukonga uuyuuiki mjita yaVietnam: Onda hala omuntu ngu ta ti: Martin okwa kambadhala okupalutha aasindjala, okuzaleka mboka ye li olutu lwowala, okutalela po aanandholongo nokuhola nokuyakula omuntu kehe."

Pantopolwa yEpistoli kAakorinto 13: Martin okwa tsikile ta ti: "Ngele owa hala okupopya ndje kutya onda kala oshiyela tashi ngelengendja, hokolola shila kutya osha li tashj ngelengendjele onkalathano yi kale tayj pangelwa kuuyuuiki, tashi ngelengendjele ombili yi adhike komuntu kehe iinima ayihe ya gwedhwa ko, oyowala.

"Inandi lalakanena ndi thige po omamaliwa oge ndji, mu thigulule, aawe. Inandi hala ndi mu thigile omagumbo omawanawa njihauto. Shona nda hala, ondi mu thigile omwenyo gwa ga-

ndjwa ondjambo. Ngele tandi si, ando ndi thige nda kwatha wo tuu nando omuntu gumwe mpaka. Ando ndi se wo tuu nda jmbila nando omuntu gumwe eimbilo lyenyanyu, ando ndi se wo tuu nda pukulula nando gumwe mpaka te ende nondjila yepuko - ando okukalamwenyo kwandje mpaka otaku kala kaku shi we osima."

Omusi osho a ti, dr. M.L.King osho a li ngeyi, euvitho lye ndika olyo lya ka kala shili euvitho enene pombila ye lya dhanwa mokakola nepo pitho ekwawo pahupji. Omutekulu gwomupika, Kalunga okwe mu longitha ngeyi a kondjithe uulunde muAmerika. Eitaalo lye olya li ihaali tenguka moshjinima shika kutya elongitho lyoonkondo oshinima sha puka noitashi ziminwa kuKalunga. Ombili kuye oshinima tashj hulitha po oontamanana nomangwandjulathano mombinga yuupolotika, yomahupilo noyelongo. Ihe oye wo okwiitaala kutya uuyogoki nuulunde kehe jtau kondjithwa mokati kaantu nomukalo goku u mwenena noku u tala onteni nenge oku u mbweenga. Otau hulithwa po kelongelokumwe lyaayehe, taa inyenge shimwe, ihe omombjili.

Okwa li omumentu a tumwa kuKalunga methimbo lyetu a fa Omuprofiti Jesaja nenge Hosea ngoka u uvithile ohole nedhiminathanopo pethimbo lye. Muukuluntu womimvo 39 adhike Kalunga okwa tala oshilonga she sha gwana sigo ompaka. "Ongushu yomuntu kayi li muule womasiku ge kombanda ye, ihe omushono e shi ningile yakwawo.

Ijimati yiilonga ye otayi liwa sigo onena muAmerika.

(Lya hokololwa peha lyotundimbibeli moshigongi shoshitayingeleka mOndonga eti 13-15.6.1975 mOniipa kuSebulon Ekandjo).



**Omusita Sebulon Ekandjo**

**ETSEYITHO KAALESHI YOSHIFO SHOMUKWETU**

Ookuume kOmukwetu amuhe mboka hamu lesa oshifo shika otatu mu tseyithile ngeyi kutya, omolwomalunduluko giinima nenge omangushuluko giimaliwa ngoka ga lunduluka, ano sho oranda yaa na we oonkondo, onkee oshifo she-tu oshi na okulandwa ngeyi komumvo R2, 00.


Osho wo ondando yoshifo shimwe oyi li ngeyi 10c (eksemplaar).

Kombanda yomafuta R4, 00 mboka taa tuminwa oshifo nolweendo lwondhila okuya kombanda yomafuta R5, 00.



## OLWEENDO LWA AMAKUTUWA KUISRAEL

Oshilongo shika osha totwa 1948. Osha ku-ndukwa kiilongo ine yaArabia Kuumbangalantu oku na Libanon, kuuzilo Osiria naJordan kuSuidwes oEgipiti. Mevi ndika omwa kala omalugodhi omalulululu okuza kolongo ndjo. Oga li pethimbo lyaAbraham sigo onena. Aantu oya pita mo-maudhigu ogendji gapitilila unene.



**Omutonatelishitayingeleka  
Jason Amakutuwa**

Evi olya nika ombuga noli noondundu. Okufu kwawo oKotoba-Maalitsa Oku na utalala, nomvula ohashi vulika yi loke nepoola. Oshitemamvula Maalitsa-Mai ohaku kala uupyu noluteni. Othinge Juni-Septemba ohaku kala uupyu noluteni wo. Omvula yepoola ohayi loko muGalilea. Iimaliwa yawo "Lira" 1-116 1974.

Ohaa popithathana-Shalom-ombjili-"Inga tu monathana"-Le-hit-ra-ot!" Boker Tov, Erew Tov, epopitho.

### JERUSALEM

Jerusalema osho oshilandopangelo mulrael. Jerusalem shi na aantu 300,000 ngashingeyi.

Aajuda.....285,000  
Aamuhamendi.....70,000  
Aakriste.....15,000

Jerusalem eha lyombili lya zi koshiheberi shalom. Oshilando shika oshiyapuki kaajuda, aakriste nokaamuhamendi. Osha li nale oshilandopangelo muuyuni waDavid sigo Sedekia. Osho oshilando shaaprofeti, Jesaja naMika sigo oJeremia, Habakuk, Sefanja, Hiskel, Haggai sigo Sakaria.

Ekuma ndyoka lyonena olya tungilwe pethelimumvo eti 16 li niyelo omugoyi, Omweelo gwa-

Sion mokolonela kuumbugantuninginino, omweelo gwaJefta kuuninginino, omweelo omupe omweelo gwaDamaskus nogwa Herodes muumbangalantu ST Stefanus nenge omweelo gwonime nomweelo gwe edhilwa omweelo gwo-shingoli muuzilo na Dug/Dung Cate muumbugantu. Ekuma lyiinonoma yetanda.

Oshilando oshikulu oshj na iitopolwa ine: Omweelo gwaDamakuskus

—; ;—Jefta

2, Via Dolorosa

3, The church of Holy Sepulche

4, Ehala lyuukelesti (uukriste)

Jesus okwa vaelwa muBethlehem (5B C)

(33) muuyuni wa Herodes.

Jesus okwe ende muJerusalem

1, Manka okahanona Ruk. 2:22-39

2, ———-omputu Luk. 2:41-50

3, Osho omulongi Joh. 2:13-22

4, Omuvu gwoku Betesda Joh. 5:

5, Osondaha iiyale Mark. 11:16

6, Uulalelo Uuyapuki Mark. 11

7, KooKayefa, Mark. 14:32

8, Pilatus Joh. 18:28,29

9, Gabbatha Joh. 18:28,19:13

10, Golgatha Mat. 27:33

### Ethimbo lyaArabia

Aamuhamendi oya lala Jerusalem 637 nekodhi limwe Kalif Omar lyomaawiliki yalsilama olya itu emanya eholekwa mehalandjandja lyotempeli nolya ningi eha lyelongelokalanga. Kalif Omor okwa li omulandulj gwaMuhamendi. Damaskus osho sha li shelelo, ndele Kalif Abd ELMallek okwa tungitha otempeli 691 peha lyotempeli yaSalomo-Dome of the Rock. Eha lyotempeli ondundu Moria.

Kalif Omor ota tj pemanya mpoka pwa li tapu dhipagelwa Isak opo naanaa mpoka pwa tungwa wo ongeleka kuJustianus Basilika e yi tungile St. Mary 550.

### ISRAEL

Otempelj yaSalomo oya tungwa 950 Bc oya hanagulwa po ku Nebukadensar 586 Bc Etungululo lyotempeli 520 Bc neopaleko lyayo kuHerodes 10 Bc nehanagulo lyayo 70 Bc.

### EYUMUKO

Ongeleka yeyumuko oya talwa oyo katokoti kuuyapuki kombanda yevi, unene muuyuni wa Konstantius. Ongeleka ndjika oya tungwa ku-Helena pethete etine. Mpaka opu nongeleka yaandowishj wo.

Jerusalem Oshipe osha kala omimvo 130. Omu-Egipiti Ibrahim Pasha okwa pa ndjithwa ohoni 1840. Aajuda oya lala 1948 noya kondjo omalugodhi omalulu sigo 1967 uuna ya lala evi lya Palestina.

1. Bethlehem osha tungululwa kaaFransa 1160 pokati ope nomuthima "Well of the Magi" pevululukilo lyaanongo yokuuzilo neha lyezilo po lya Elia uuna a yi megulu. Nale mpaka opwa li ongamba ya Israel naJordan, ombila yaRakel mukadha Jakob otayi monika popepi ope na okalando Beit-Jala-Gallim Jes. 10:30 1 Sam. 25: 44 na Giloh egumbo lyAhitofel 2 Sam. 15:12.

Oshilando sha sjimana. Muka omo maandja Boas sigo oDavid yalsai. Omukwaniilwa okwa valelwa muka. Oshitya moshiheberi-Beth-Lehem-egumbo lyiithjima. Eha ndika olyaaJuda. Helena yi-na yaKonstantius okwa tungile mo ongeleka ya tya ndeya 330 Mo 600 okwa li ku noongeleka odhindji nodha mbyonyagulwa po kaayarabia 1099. Aafransa oye dhi tungulula 1489.

Ongeleka ya Krjsmesa noyevale lyOmuwa-Aa-ortodoksi nAaroma nArmenia oya tungile ongulululo pekololo mpo pwa talwa pwa li oshigunda shimuna. Konstantius sho a li a hala a tungile ongeleka peha ndyoka aantu ye li mu ulukile. Elundu lyaasita oli li pehalala mpoka Rut ya tsakanene naBoas ngoka a ningi omukadhona, na Rut a mono omulume, popepi mpoka Rut opu nomiti dhoomono. Pokati ope nekololo mpoka pwa li aasita.

3. Hebron, Okuza kombila ya Rakel u uka kuumbugantu to piti moondundu dhaJudea oto ya ko ketale lya Salomo, Pontius Pilatus okwa longithile wo etale ndika sigo ta yi kuHebron

**Tala kep. 6**



Abraham okwa li mpoka puMamre. Oku na omatungo omanene gaHerodes omunene na Konstantius. Manga ino adha Hebron oto itsu momuthima gwa Sara 2 Sam 3:26 mpoka Joba a dhipagele Abner molwonkone sho Abner a dhipagele omumwayina Asahel.

Hebron oshikulukulu Gen. 23:2 ohashi jthanwa Kiryat Arba Saara mukadha Abraham opo a manena oondjenda dhe mpoka, Abraham okwa landa epya lya Efron omuheti pamwe nekolo lo lyaMakpela li ninge omawendo ge. Gen. 23: Ano mpaka opo pwa fumvikwa Abraham nomukadhi Sara Isak nomukadhi Rebek Jakob nomukadhi Lea. Oshilongo sha vunyagulwa po ku Josua Jes. 10:36. Osha li mezimo lyaJuda nsha li sheholameno nosha li oshilandopangelo muuyuni waDavid omimvo heyali. Absalom opo a valelwa mpoka nopo a tukulila he David oshipotha 2 Sam. 15:10 Arabia sho ye shi lala methelemumvo etiheyali osha ningi kuyo oshiyapuki.

Omosikea ya Abraham oya tungilwa kombanda yekololo lyaMakpela.

4. BETANIA, egumbo lyooniikombokwaali nenge lyooiyitsauyuye. Okalando komaila netata oke li kuuzilo waJerusalem. Muuyuni waJesus ondjila yokolupadhi otayi pitile kondundu yoomono. Jesus okwa talele po okagumbo kaMarta naMarja nomumwayina Lasarus nokwa li maandja Simon omunuurepela Mark. 14:3. Ombila yaLasarus oyi li owala popepi negumbo kwa fa komukala nenge polukutu, okuuka mevi. JERIKO otashi ti ehala lyomulyo nenge oshilando oshikulukulu mwa ningilwa iinyengandunge oyindji.

1. Jos. 6:20. Ekumuko lyohote netango lya thikama.

2. Jos. 6:26. Ethingo lyomutungululi.

3. 1 Aakw. 16:34 Hijele e shi toola po.

4. 2. Aakw. 2:4.

5. Ondundu yemakelo.

6. Omeya omatoye 2 Kor. 2:22 sho ga toywa, onde ganwa wo omatoye.

7. Bartitomes naSakeus nomusamaria.

Aayuda oye shi mboniyagula po methele 13 Bc. Oshilando oshi nuuyamba molwothithiya yElisa. Uuyamba otaw zi miyimati yoongongo noombanana to dhunga ko owala elaka omuunyunga yowala.

6. Efuta lyeso oli li oomaila 9 okuza kuJeriko li nuule woomaila 48 nomukokomoko gwoomaila 10. muule womizalo 655 (1310ff) niikwamina oyindji.

a) Chlorin-uuzigo-iikwasota 67%

b) Bromine-iikwakayishi iyela hayi longithwa moophotograf nomiti medisne 1-98%

c) Sulphate-22% -iikwasulfuri.

d) Sodium 10-20% iikwasulfuri.-soda.

e) Potasium 1.60% iikwatayima iiweliweliyela.

f) Calcium 1:51% —, —, — yomwenyo momasipa nomomayego.

g) Magnesium 16-80 —, — hayi longithwa mu Arminium.

Mefuta lyeso omeya oga fa omahoolj omayelele kombanda yago ito ningine aawe, oto fugalala owala. Efuta ndika oli li mpoka pwa li Sodom naGomora.

7. Engedi mpoka David a li a holamena Saul 1 Sam. 24:1-2. Oluthithiya lwoomenye niikombo. Eha oli li komunkulo gwefuta.

8. Beer-Seva-Omuthima gomuntu Gen. 21:31. Muka omwa kala Abraham, Isak naJakob. Omunothithiya odhindji. Onda li pomuthima mpoka Abraham a lalekele Hagar naIsmael, oshilando oshipe oshi naantu 100,000.

9. Bethel opo mpoka Jakob a lala ondjodhi. Abraham sho e ya mu Kanaan okwa tulile pokati ka Bethel na Ai. Kehala ndika okwa li Gideon ya Joas nosho kwa sile Judas Makal-seus.

10. Silo osho oshilando sha Elia noshoshiketha shehangano. Aaisrael oya ka galikana ku-Silo.

11. Onyombo yaJakob oyi li monyonga ya Garisima mpoka Jesus a popi nomukiintu omusamaria. Omuthima nena ogu li mongeleka Greek Ortodoksi uule womuthima omizalo 60(120(t). Omeya onde ga nwa ondjengo yowala. Eha lyomuthima olya lalwa kaakriste methele etjine.

12. Shechem osha totwa 2000 Bc Jakob okwa kalele muSikema moka omona Diina a kwatwa onkondelela ku Sikema ya Hemor. Eha ndika oli li pokati ka Garjism na Ebal. Vespasianus okwa vunyagula po oshilando shika shaantu 11,000 momumvo 67 AD.

13. Aasamaria. Nena oye li po 250 ayehe muuyuni, oye nelongelokalunga lyawo elaka lyawo oshisamaria. Lyolyene odjaleke yoshiheberi, ndele oli ili. Omusaseri omukuluntu oye ngaa sha. Samaria osha totwa kuOmri 876Bc. 1 Aakw. 16:24. Osha li oshipangelalando mulrael. Osha tsomekwa kuSargon 721 Bc. Omukwanijlwa gwa Ninive. Aatyakala oya thigalapo inaa falwa meti noya vundakana naamesoptamia, Alexander omunene okwe shi lala 331BC. Johannes Hirkanus munene nokwe shi hanagula po 129 BC, osha opalekwa kuHerodes omunene 27BC, nokwe shi ithana "Sebast" mokusimane-ka Sebastos omugreka. Aayapostoli oyu uvithile muSamaria.

Samaria-Shomeroneha lyetonatelo. Osha li mezimo lya Efraim naManasse.

Oshilongo wo osha fa shi ithanwa Samaria. Okuza koondundu dha Gilboa ndongo oMegido-Uukwanilwa owa li mezimo lyaDavid. 1000-960BC na Salomo 960-920BC. Peso lya Salomo oshilongo shatopoka.

lilando yasimana.

1. 1 Aakw. 16: 15, 23 Tirsa Ombala.

2. Samara-Shomeron-Sebaste sha totwa ku Omir 876-869. Ombala ye.

3. Shechem Nablus nena shi li pokati ka Ebal naGarisim otempeli kondundu ya Garisim onde yi tala.

4. Siloh eha lya shiketha shehangano.

5. Megiddo (Armageddon).

6. Ejn-Ganim na Hazer

14. Dotha mpoka Josef a landelwa po kaamwaha Gen. 37:17-24.

15. Enganim Jos. 19:21. Luk. 17:11-19 paanuulepera omulongo ya a ludhwa kuJesus.

16. Esilu lya Jezreel epya lya Naboth. Oondundu dha Gilboa tadh monika mpoka Saul a sila noyana "Uulenga wlsrael wa sindilwa koondundu. 2 Sam. 1:17 mesilu omu na okalando Afula ka totwa po 1925 anuwa omu na olwii-dhi lwaMalalia.

17. Shunem 2 Aakw. 4:8-37 moka Elisa a yumudha omuna gwomukiintu Omusunema moka omwa li egumbo lyaandja Abshah omuyakuli gwa-David omukadhona omuyeleele, David sho a si Adonia okwa li a halae mu hokane po 1 Aakw. 4,4,2: 13-25. Okuza mu Afula ondjila yimwe oyu uka ku Tabor yimwe kuNasareth.

18. Nasareth shika osho oshilando sha Jesus popepi negumbo lya Josef ope nomuthima gwanekulu Maria. Greek Ortodoksi, okwa tungile popepi nagwo ongeleka ya Gabriel hayi ithanwa ongeleka yeihololo lyomuyengeli ku nekulu. Aafansikus oya tungile po ongeleka paandja Josef ya tula ehala alihe meni. Popepi opu na ongeleka yaJosef nontega nayo Aakatooli Aagrega oya tungile po ongeleka mekwatathano noshinagoga ya Nasareth. Okuza ku Nasareth sigo ku Bethelhem oomaila 85, ondjila otayi pitjile pu Gath-Hefer peha lya Jona yaAmitayi naKaana sha Galilea tayi piti pesilu "Horns of Hatting mpoka pwa pwakelele ita yaandjendamushigakano eti 4 Julij 1187 uuna aakriste ya dhengwa ku Saladin noya tidhwa mo melelo lyoshilongo.

19. Tiberias osha totwa po ku Herodes Nene 21 AD e te shi lukile omukesari Tiberius. Jerusalem sho sha mboniyagulwa po sha kala sha simana methete etiyali kaAjuda. Omushangwa gwaajuda "Mishna" ogwa pile muka, 200 AD nomathele etine omushangwa gwasimana "Talmudi ogwa manwa mu Tiberias". Aahongi ya simana oya ilongo noya kala moshilongo tuu moka, noya sile mo etaa fumvikwa mu Tiberias. Harambam ekologo muifilosofi nenyakwa lyokunyola omambo methele eti 12, omo lya fumvikwa muka. Oorabi Meir BaalHanes, Akiva, Johanan Ben Zakai Hiyya nooyakwawo aakondjeli yeitaalo lyawo omo ya langekwa muka.

Tala kep. 7



Tiberias osha lalwa kAarabia 637 AD, Osha adhikile aakriste ye shi lela okuza 1099 osha teka po sho Saladin e ya dhenge 1187. Oshilando sha tunguulwa kaaEgipiti 1242. Aaturki ye shi lala 1560, methele eti 18 osha li melelo lya Daher AL Omor ngoka e shi opaleke. Aaingilisa oye shi lala eti 20 lyaSeptemba 1919 kewiliiko lyandjaji Allenby. Oohotela dhamo odha tya nde ya. Aantu ohaa yogo mefuta ya talalelwe. Efuta lyaGalilea. Omeya gometale ndika omato-ye. Oli noomaila 147. Omuwa Jesus okwa longo aantu pefuta ndika. Nge to zi kuTiberias to kunkula nefuta oto ende puMadgala paandja Maria Magdalena. Omakulukuma ashike ge li po. To piti mpa pwa kutithilwa omayovi gatano e to ya pondundu yaanelago, ombwambwambwambwa, nokangeleka ko opala. Eha lyeuku-tithilo olyo li li mongeleka

Kapernaum osinagoga yaKapernaum oya kumuka po. Etungo omamanya ge thike poondoloma. Oshilando osha li ngaa oshishona nge to tsikile ondjila oto adha Korasin okalando kaBetsaida-egumbo lyaayuli yoohi. Tabora oyo ondundu yeyelitho yi nuule 1650 ft. Oyendji ohaa dhiladhila ondundu ndjika oyo yeyelitho nando yamwe haa ti oya Harmon. Ku Tabora na Barak oya sindile ko Sirera elenga lya Jabin. Popepi opu na uulando Nain mpoka omuna gwomuseleka-dhi a yumudhwa kuJesus na En-dor- mpo pwa li onganga yaSaul.

Esilu lyaSaron oya simana nonale muuyuni wa-Salomo Ondj.2:1 ehala lyomapyo goopala, oli li popepi noshilando Tikva Pe-Tach-Tikva-epola lyontu yetegameno. Kuuzilo oku nothithiya yomulonga gwaYarkon nopopepi ope nomakulukuma ga Antipater, ga tungwa ku Herodes nena e te ga lukile he Antipater. Paulus okwa li a etwa mpaka kekakunya erooma sho e ya mondjila yu uka ku Kesaria lil. 23:31-35.

Megidd-Armageddon-Ehol. 16:16. Osha simana muutsakaneno woondjila otamu zi ondjila yu uka akuhe.

a) Ondjila yimwe otayi taakana yu uka kefuta lyopokati ya tuulunga mooTiro nooSidoni sigo oku Jerusalem wo.

b) Oondjila dhimwe odhu ukilila kuEgipiti noku Mesopotamia. Huka okwa kala amalugodhi omalululu. Thutmose 111 ngoka e shi totele 1468 BC. Nokombanda yoomvula 3386 Alenby okwe shi mbolokotele wo. Aaegipiti, Aapersia, Aagre, Aarooma, oya kala haa shitinti po.

Meggiddo okwa tsuwa po omumvo 3500 BC. Osha li miikaha yaaEgipiti nokonima oyaaKaana-na oshilandopangelo sigo sha sindwa kuDeborh naBark Aat.4:1- Salomo okwe shi tungulula 1 Aakw.9:15 Farao Shishak okwe shi matukile muuyuni waRehabeam 915 BC. Omukwaniilwa Ahazia okwa sile mu Meggiddo 842 BC. Omukwaniilwa Josia okwa sile mo wo 640-609BC. Olugodhi lwahuginina otalu ka luwa pu Meggiddo-Armagedon. Kesarea osha totwa po kuHerodes nene 20 BC. e te shi lukile kuume ke omukesari Augustus. Aajuda 20,000 oya dhipagelwa muka ku Pontius Pilatus. Aayapostoli aanene oya li mpaka. Petrus maandja Korneilius, Paulus meti pu Felks. Oohe yongeleka oya li muKesarea. Omunyoli gwehistoli Esebius omo mu nehe lye 264 AD. Oshilongo osha lalwa kAaislam methele etihayali. Osha mbonyagulwapo omumvo 1291. Oshi nomahalandjandja omutalelo omwaanawa uunene. Omu nomantu amanenenene gahongwa momamanya. Oshilongo oshi nekuma lyomizalo konyala ntano. Oshi li pefuta. Omakuma okuza kuumbugantu wu uka kuumbangalantu omizalo 333(1600ft), no-kuuzilo u uka kuuningininino 333(1000ft). Omakuma ngoka opo ge li natango, anuwa oga li ga tungululwa ku St. Lovis 1251-52.

### ISRAEL

Ashkelon oshilando oshikulu shaafilisti pefuta lyopokati. Herodes nene okwa valelwa mpoka omukiintu Delila okwa li mpoka. Herodes okwa tungile po otempeli ondumentu. Osha mbonyagulwa po ku Sultan Bibars 1270. Nena ope noshilando oshipe shaaJuda. Onda yogele mefuta mpoka uuna lumwe.

Joppe-Jaffa osha za muuyuni wonale. Omukwaniilwa Hiram okwa tumine Salomo omisederi kuJerusalem okuza mpoka. Jonas sho a li tayi kuTarsis okwa zile mpoka. Petrus okwa lumbile maandja Simon omupeli gwiipa. Onda tala omakulukuma noshilando oshipe.

### OMAIMBILO GAAJUDA

1, Jerusalem shel zahav, Veshel nechosthet "Veshel nenge Halo lecho Shiraich anikior" Jerusalem shoshingoli shoshikushu noshemini-kilo ninga ndje okangolongongo komaimbilo goye.

(Nelago -Naom Shemer-Ondigolo ya ligoelwa sho ya sindana miita yaSix Day War 1967.

2. Havenu Shalom Sleichem-Otatu kupe ombili.  
3. Ert Zavav Halav Oudevash- Oshilongo shomahini nomagadhi goonyushi.  
4. Simi yedecal yadi, Ani shelach vel at, Hei, Daliya, Bakramini yefefiya tu pathane omake ngaye ogwoye nangoye ogwandje, o, omuviinu omawawawawa moshitsambe.

5. Hava, nagila hava, nagila nagila venis mekha, hava nena- nena hava nera nena, hava, hava, venis mekha.

Tu tundulukweni tse tu nyanyukweni.

Hi-neh ma tov u-ma-naim Shevetachim gam yahad (Iwaali) Hinch, ma tav, Shevet achim gama ya-had-lwaali-

6. Osho opala ngiini oshivanawa aantu naamwayina ya tsomunoyonti pamwe".

7. Ush-avtem mayimbasa-son miayanei hay e-shua-lwaali- Mayi-(Ha mayim me-sason.

'Otamu ka teka omeya koothithiya dhehupitho. Ombushiki: Sara: otandi ku halele okukalamwe-nyo komimvo 119.

Omufuko: Omolwashike 119 aluhe oho halele ndje omimvo 120?

Ombushiki: Osho nekulu Sara, nena okwa tshuuka nawa ndee ngaye ote

tundulukwa omapashiyono tashi ti omvula yimwe ote kala kakombo ilita.

Ongeleka yaPetrus omuyapuki muGalliacaat.

Omahodhi geitedhululo taga tonatitha omeho getu tu mone Kalunga Ehala lyomahodhi ga Petrus geitedhululo tage tu ithana.

Meha ndika lyomahodhi ga Petrus geitedhululo Jesus ota tegelele aantu mboka ye nuudhigu womahodhi omalulu moluulunde koshipala sha-

Jesus yu uvite ya yona kuKalunga.

Uukukutu womutima tau tanduka uukwatya wombepe tau ndwafuka.

Eitedhululo tali kugile uulunde ndee ta li tundulukile esilohenda nekuthilo.

Ota li kanyatele gumwe oJesus Kristus.

Omuwa gwetu Jesus Kristus otatu ku lukulile ehala ndika tali tu ulukile omweelo gwe eguluka oku ku mona noku ku hola momahodhi moluulunde noondjo miikaha yetu. Mpaka owa mpakulile Omuypostoli eitedhululo nomulyo owe mu shitululula a ninge omupe ndee ta ningi elaleko nuuyamba ku yalwe. Otatu ku galikana, tu pa eitedhululo tu nyanyudha e to yambeke aantu yoye, noku ya nigulula konka yuulunde ya tseye edhimo po lyoondjo Amen.

Eitedhululo oyo eyambeko, oshoka otali tu fala kuJesus, komutima gwe, mpoka opo peha lyomulunde ngoka ina kana ndele omulunde a kanene omuna gwohole nogweadhimo. Esilohenda ndyoka Jesus a taamba nalyo Petrus ote tu taamba tse aalunde e ta theta po omahodhi getu. Olwindji nge tatu itedhulula shoka twa ningile Jesus omuulunde wetu otatu ilongo oku mu hola.

### GETSEMANE

Aafranisa oya tula muGetsemane methele eti heyali: Mu Getsemane omu nomimono hetatu odho oonzapo dhehupitho, aakriste oye dhi tunda unene. Otwa pewa Uulalelo Uuyapuki mpa-ka kuPata gumwe.

Oye na "Daily Prayer for the dying" tali ti: Jesus gwolune lwaa na ndjele, ongoka omutima gwoye omuholekwalela guwehame waashi ku tumbulwa, -----aalunde yomuuyuni yo opalekitha ombinzi yoye mboka ye li nena muwehame wawo notaa si nena Amen.



### 3. Peha lya Johannes omushashi.

Kapena naana ondjokonona yehala lya Johannes nenge mpoka Maria na Elisabeth ya tsakanene, ndele ohaku dhiladhilwa okakunda ke li popepi na Jerusalem kutya oka fa ngaa oko ka valemwa Johannes. Ein Kerem. Theodosius okwa nyola 530 AD. ta ti Elisabeth yina ya Johannes okwa kala momukunda gwopopepi na Jerusalem oomaila 3. Ina tumbula edhina lyehala, ndele nduno okakunda ka tya ngaaka oEin Kerem. edhina olya tomonwa koshito mondjalulamasiku ya Grerius sho oshituthi shongeleka mu Jerusalem sha dhanwa noshongeleka y Elisabeth muEin Kerem. Nale aantu oya dhiladhila kutya Johannes okwa valemwa mu Jerusalem ndele kombunda oya dhiladhila kutya okwa kala muEin Kerem popwene opwa kala ngaa omuto-tolombo tagu ti, Elisabeth okwa pandjele oohoni sho Herodes a langulile aantu iipundjame nye yowala. Opu na ne eekamo lyemanya peholameno lye. Po pwene opwa fa mpaka opo pwa li paandjawa oshoka Sakaria okwa li ngaa e netsali lye mpoka Elisabeth ivutulile omukwati gwomafuma. Maria sho i ile kaandja Sakaria okwa adhele Elisabeth mepya nosho ya mololathana Maria okwa totomona oshitewo she. Nokombunda ombwale nee ndjika mandaha Sakaria okwe shi lafula sho mesiku lyetanda uuna okamentu ka piithwa a kalukile. Endjokonono ndino lya za kethele etitano olyaafransius sigo pomumvo 1679. Oya tungu ongeleka 1938. Yoyene aalali yeha ndyoka sho ya tungile ongeleka 1621. ya tungilwe nale pethele etihayali. Oka-putsage haka ka putudhilwa mu Ein Kerem oka longekidhwa ku Kalunga okuhokololela aantu ehala lya Kalunga kutya omukashuli guuyuni okwe ya. Okwa longekidhile Omuwa ondjila. Ewi lyomukugilili montala. Mesias ota tegelelwa natango e ye.

#### 1. Ongeleka ya Johannes muHelsinki

Ongeleka ya Johannes omuyapuki nale oya li haku tiwa ongeleka ompe. Oya thigilwe momimvo 1887-1891 pafaneko lyonkulungu omuSvedeni E.E. Meender molupe lwopa Gooti. Ooshungo mbali odhi nuule woometeli 74 Oaltari oya longithwa ku Eero Jarnefett. Okahumba oka longithwa kofabrika yuuhumba ya Wurtenberg ku EF. Wakeker. Ofabrika onene mu Helsinki. Egumbo ndyoka lyeeshapistopu 74. Aasvedeni nAasoomi oye li megongalo ndika mepathanolofu. Aantu otaa gwana mo 2,600.

#### 2. Ongeleka ya Varlaus

Ongeleka ndjika oyi noshungo yongendjo yuule 35. Metungo olya tamekwa 3 Juni 1937 noya hulu 31 Aguste 1939 omuyapuli oEino Sormunen gwaKuopio. Okahumba oka tungwa kaaKangasala. Kekuma lyoartali oku nomafano Jesus naalngwa ye.

#### 3. Ongeleka onkulu ya Messukyla oya lukilwa Mikael.

Oya za kethele eti 6, oya tungilwe miipilangi oya kala sigo omathele 16 noya tungululwa nomamanya. Ohaku tiwa egongalo ndjoka olya mono eipangelo omumvo 1636 nokuza mpoka opwa kala omaopaleko ndongo okomumvo 1959. Omaopaleko ga kwata miiti oga kala okuza 1796-97.

Aapapudhuki aarotsalainenna oya gongala muka noya umbu ongalo yokukwatha etanga lyaadhiliki muELOK.

Jason Amakutuwa



**Omufitaongalo  
Tatekulu  
A. Mungungu**



**Meme Aino Namutenya nosheeli she**

#### OMWENYO MWENA!

Omwenyo mwena inekela  
Omunankondo Mushiti gwoye  
Kathimbo shaa wa tegelela  
Te ku kuth' uudhigu woye  
Aluhe puye pu nombili  
Uuyelete te ku pe shili  
Omwenyo mwena!

Nge te ku adha moluhodhi  
Te ku gwedhele uupenda  
Oye ta theta po omahodhi  
Te ku koleke moondjenda  
Omutenge gwoye te gu tula  
Moonkandja te ku mangulula  
Omwenyo mwena!

Mongundu ndjiya yomegulu  
Te ku thikithile shili  
Ekondjo neso olya hulu  
Pe nesindano nombili  
Elago lyoye lyaa noongamba  
Menyanyu ndiya lyokombanda  
Omwenyo mwena!

#### OMUKWETU

Oye oshifo shOngeleka onkwaevangeli paLuther yomOwambokavango. Ohashi nyenyangidhwa mOnIipa. Omukutuntu gwoshifo omumbisofu dr. Leonard Auala.

Ondando yoshifo komumvo muSuidwes nomuAfrika alIhe R 1. 00 kombanda yomafuta R 2. 00.

Ondando nomambesitelo naga tumwe kOmuKwetu OnIipa: P/B. 2013, Ondangwa.

Omatseyitho agehe gomuntu mwene ohaga futliwa kumwene.

OWAMBOKAVANGO CHURCH PRESS  
PRIVATE BAG 2013, ONDANGWA S.W.A.  
9270